

Forskrift om gravplassvedtekter i Vang kommune, Innlandet

Vedtatt av Vang kyrkjelege fellestråd (dato) med heimel i lov av 7. juni 1996 nr. 32 om gravplasser, kremasjon og gravferd (gravplasslova) § 21 første ledd, § 8 første ledd og § 14 første ledd og forskrift til lov om gravplasser, kremasjon og gravferd av 10. januar 1997 nr. 16 (gravplassforskrifta) § 5 annet ledd 15a fjerde ledd.

Godkjent av Statsforvaltaren i Vestfold og Telemark (dato), jamfør lov av 7. juni 1996 nr. 32 om gravplasser, kremasjon og gravferd (ledd) § 21 første ledd.

§ 1 FORVALTNING

Vang kyrkjelege fellestråd er gravplassmyndigheit i Vang kommune.

§ 2. DEFINISJONAR

Fri grav: Grav som gravplassmyndigheita har tildelt ein avdød person frå kommunen, og som det ikkje blir betalt festeavgift for i fredingstida.

Festa grav: Grav som det er inngått eller fornya festeavtale for, jf. gravplasslova § 14.

Festa gravstad: Fleire kistegraver som er festa saman.

Ordinær urnegrav: Grav til oskeurne med plass til fire urner, jf. gravplassforskrifta § 14.

Urnegrav i minnelund: Grav til oskeurne i minnelund med plass til éi urne.

Kistegrav: Grav som stettar forskrifta sine krav til storleik for gravlegging av kister. I ei kistegrav kan det også gravleggjast urner.

Fredingstid: Tidsrom frå siste gravlegging til grava kan takast i bruk igjen til ny gravlegging.

Festetid: Tida det er avtala å feste ei grav for.

Gravansvarleg: Den som er ansvarleg for ei fri grav.

Festar: Den som står som part i ein festeavtale.

Namna minnelund: Gravfelt med felles minnesmerke med namn og dato på dei som er gravlagde der.

§ 3. FERDSEL PÅ GRAVPLASSANE

Besøkande skal om mogleg ferdest gåande eller i rullestol, jf. gravplassforskrifta § 9.

Gravplassmyndigheita kan etter søknad gi løyve til å køyre ved dokumentert sjukdom/forflyttingshemming. All køyring skal skje særleg omsynsfullt.

§ 4. GRAVPLASSTILHØYRING

Avdøde personar i kommunen kan gravleggjast på kva som helst av gravplassane i kommunen.

Dei har rett til fri grav så framst grava er tilvist. Retten til fri grav fylgjer fredningstida og kan forlengast etter reglane i gravplassforskrifta § 16 og § 18.

Avdøde personar som på grunn av sjukdom eller alderdom har budd i ein annan kommune mot slutten av livet, blir medrekna på same måte som kommunens egne innbyggjarar, og har rett til fri grav så framst grava er tilvist.

Avdøde personar frå andre kommunar kan bli gravlagt i kommunen mot at kostnadane ved gravferda og avgift som ved feste av grav blir betalt.

§ 5. FREDINGSTID

Fredingstida for kiste- og urnegravlegging er 20 år.

§ 6. STENING FOR KISTEGRAVLEGGING

Gravfelt A på Høre kyrkjegard er stengt for kistegravlegging, jf. gravplassforskrifta § 5. Årsaka er små gravstørrelser og bestemmelser om vern/freding underlagt kulturminnelova. Urner kan benyttes i kistegravene, men berre innafør gravåpninga.

§ 7. FESTE AV GRAV MED MEIR

Når kistegrav skal takast i bruk er det høve til å feste ei grav ved sida av, og etter søknad til gravplassmyndigheita; for ei ekstra grav i tillegg når behovet tilseier det. Desse gravene utgjer då éin gravstad.

Ved bruk av ordinær urnegrav kan det ikkje bli festa ei grav ved sida av.

Ved feste av grav ved sida av den kistegrava som blir tatt i bruk, er festetida 20 år. Når festetida/fredingstida er ute, kan grava/gravstaden bli festa for nye 20 år. Når det er gått 60 år etter siste gravlegging, kan festet ikkje bli fornya utan etter spesielt samtykkje frå gravplassmyndigheita.

I god tid før festetida er ute skal festaren bli varsla. Er ikkje festet blitt fornya innan seks månader etter forfall, fell grava eller gravstaden tilbake til gravplassen.

Innbetalt festeavgift blir berre betalt tilbake dersom tilbakebetaling følgjer av bindande rettsreglar eller det ligg føre særlege grunnar.

Ingen kan bli gravlagt i festa grav/gravstad utan festaren sitt samtykkje. Dersom det ikkje er råd å hente inn samtykkje frå den ansvarlege eller festaren til bruk av grav, kan gravplassmyndigheita ta avgjersle om gravlegging. Festar pliktar å melde adresseendring.

§ 8. GRAV OG GRAVMINNE

Ved opning av grav kan jord bli lagt på omkringliggande graver og gravutstyr kan mellombels bli flytta. Gravplassmyndigheita sørgjer for istandsetting igjen, og vil også sjå til at grava blir planert og tilsådd med gras inntil 1 år etter gravlegging. Montering av gravminne kan først skje etter at gravplassmyndigheita har godkjent gravminnet og merka staden der det skal stå. Det kan ikkje bli sett opp tidlegare enn 6 månader etter gravlegging av kiste. Gravminne på urnegrav kan bli sett opp med ein gong etter urnenedsetting.

På nyfesta gravstad skal gravminnet plasserast i bakkant av den grava som er take i bruk, etter anvisning frå gravplassmyndigheten. Anna plassering av gravminnet må det søkast spesielt om til gravplassmyndigheita. Ved reduksjon av gravar på ein gravstad (sletting/endring av festeavtala) må gravminne og fundamentet flyttast til dei graver som skal bestå.

Det er gravansvarleg eller festar som har ansvaret med å sette opp eller flytta på gravminne og fundament.

§ 9. PLANTEFELT

Framfor gravminnet er det høve til å opparbeide eit plantefelt i høgde med bakken omkring. Det må ikkje vere breiare enn gravminnet si breidde, men kan i alle tilfelle vere opp til 60 cm breitt. Det kan ikkje stikke lengre fram enn 60 cm, målt frå gravminnet sin bakkant. Det kan ikkje plantast vekstar som overstig gravminnet si høgd eller går utover plantefeltet. Det er ikkje høve til å plante på begge sider av eit gravminne.

I plantefeltet er det høve til å setta ned dekorgjenstandar og sorguttrykk, så lenge dei ikkje er til sjenanse, gjer drifta av gravplassen vanskeleg (opning av grav, grasklipping, o.l.), eller er brannfarleg i samband med tenning av lys, jamfør neste avsnitt.

Det er høve til å tenne lys (stearinlys, oljelampe ol.) når dette er innanfor dei gjeldande føresegnene om brannvern. På grunn av brannfare kan ein ikkje bruke levande lys/faklar ved Høre stavkyrkje.

Lys og lause gjenstandar kan spres med vinden, tas av fuglar og skade vilt, beitedyr, matproduksjonen og natur i nærområdet. Alle lys, med eller utan metallokk må plasserast i eigne lykter, som må vera tilstrekkeleg festa, til dømes med jordspyd, eller ha ei eigenvekt som gjer at dei ikkje kjem på avveggar.

Ein skal fjerne lys og andre lause dekorgjenstandar etter bruk.

Det er høve til å ramme inn plantefelt med delt steinkant eller bedplate som fluktar med terrenget omkring. Bedplate og fundament for gravminne skal ikkje henge saman.

Dersom det ikkje er aktuelt å ha plantefelt, skal det vere grasbakke på alle sider av gravminnet.

Det er ikkje høve til å ramme inn grava med hekk eller andre materiale.

§ 10. PLANTEMATERIALE

Planter, kransar og liknande materiale som blir nytta ved gravferd eller ved pynting av grav og som endar som avfall, skal fullt ut vere kompostérbart.

§ 11. STELL AV GRAV

Kvar ansvarleg for frigrav eller gravfestar har rett og plikt til å stelle den grava vedkomande har ansvaret for. Plantefelt som ikkje blir tilplanta eller stelt skal såast til av den ansvarlege eller bli sådd til av gravplassmyndigheita.

Ansvarleg for grav eller festar pliktar å halde gravminnet sikra og i forsvarleg stand.

Festar/gravansvarleg kan inngå avtale med fellesrådet eller andre som får løyve etter § 14, til å utføre tenester for seg. Ein slik avtale frittek ikkje festar/gravansvarleg frå ansvaret dei har etter reglane som gjeld til ei kvar tid.

§ 12. NAMNA MINNELUND

Ved gravlegging i namna minnelund skal namn og data til avdøde først på ei namneplate på felles minnesmerke, fastsett av gravplassmyndigheita.

Graver i namna minnelund kan bli festa etter fredingstidas utløp på lik linje med andre graver på gravplassen. Det vil likevel ikkje vere høve til å nytte grava til ny gravlegging i festetida.

I namna minnelund kan det bli festa ei grav attmed (reservering). Ved feste av grav attmed skal det betalast festeavgift frå tidspunktet då den første grava blir tatt i bruk. Namna kjem attmed kvar andre på felles minnesmerke.

Avgift for bruk av namna minnelund blir betalt frå det tidspunktet grava blir tatt i bruk.

Gravplassmyndigheita har ansvaret for felles planting og stell i minnelunden.

Det er ikkje høve til å opparbeide eige plantefelt for grav i minnelund. Det kan leggest ned blomar og tennast gravlys så lenge dette er innanfor gjeldande reglar om brannvern, på ein stad tilvist av gravplassmyndigheita.

§ 13. BÅREROM

Bårerom blir disponert av gravplassmyndigheita, og skal berre nyttast til oppbevaring av døde i tida fram til gravferda. Ingen har tilgang utan etter løyve. Liksyning kan berre finne stad etter samtykke frå den som står for gravferda, og vedkjem ikkje dei tilsette.

§ 14. NÆRINGSVERKSEMD

Næringsdrivande som ønskjer å drive verksemd på gravplassen skal hente inn løyve frå gravplassmyndigheita. Løyvet kan kallast tilbake dersom vedkomande ikkje rettar seg etter dei reglane som gjeld. Slik verksemd kan berre omfatte montering, sikring og vedlikehald av gravminne og planting og stell av graver.

§ 15. ARBEID PÅ GRAVPLASSANE

Anleggs- og vedlikehaldsarbeid skal foregå på kvardagar i arbeidstida (kl. 07:00-17:00) og må ikkje utførast på søndagar, heilagdagane eller offentlege høgtidsdagane. I sumarsesongen juni, juli og august kan arbeidstida helde fram til kl. 21:00.

Ikkje noko arbeid på gravplassen må vere til sjenanse for seremoniar eller rituelle handlingar på gravplass eller i bygning på gravplass. Næringsdrivande kan berre køyre på gravplassen i den grad det er nødvendig for å utføre arbeidet. Slik køyring skal skje ekstra omsynsfullt.

§ 16. Dispensasjon frå vedtektene

Gravplassmyndigheita kan i særlege tilhøve og innanfor ramma av gravplassloven og gjeldande forskrifter fråvike vedtektene.

§ 17. IKRAFTSETJING OG OPPHEVING AV ELDRE VEDTEKTER

Denne forskrifta om gravplassvedtekter trer i kraft frå (dato). Frå same tid blir tidlegare vedtekter for gravplassane i Vang kommune, Innlandet fylke, oppheva.